



Broj: 07/2-14-998/19

Vogošća, 20.06.2019. godine

Na osnovu člana 70. Zakona o javnim nabavkama BiH ("Službeni glasnik BiH" broj: 39/14), i čl. 71. i 125. Statuta Općine Vogošća ("Službene novine Kantona Sarajevo", broj 27/14 i 14/15 Prečišćeni tekst), Općinski načelnik dana 20.06.2019. godine donio je

### **ODLUKU**

## **O IZBORU NAJPOVOLJNIJEG PONUĐAČA ZA PRUŽANJE USLUGE IZRADE IDEJNOG I IZVEDBENOG PROJEKTA ULAZA U ZGRADU OPĆINE SA REKONSTRUKCIJOM ŠALTER SALE I UGRADNJOM LIFTA, TE RJEŠENJEM SAOBRAČAJA U MIROVANJU I HORTIKULTURE**

### **Član 1.**

Ponuda ponuđača "I.D.E..A" d.o.o. Sarajevo, ulica Curak broj 2. Sarajevo, odabrana je za pružanje usluge izrade Idejnog i Izvedbenog projekta ulaza u zgradu Općine sa rekonstrukcijom šalter sale i ugradnjom lifta, te rješenjem saobraćaja u mirovanju i hortikulture, kao prvoplasirana na Rang listi, sa ponuđenom najnižom cijenom tehnički zadovoljavajuće ponude u ukupnom iznosu od 15.000,00 KM bez uračunatog PDV-a, odnosno 17.550,00 KM sa uračunatim PDV-om.

### **Član 2.**

Ova Odluka stupa na snagu danom donošenja, a objaviće se na web stranici Općine Vogošća, istovremeno s upućivanjem ponuđačima koji su učestvovali u postupku javne nabavke, u skladu sa članom 70. stav 6. Zakona o javnim nabavkama BiH.

### **OBRAZLOŽENJE**

Općinski načelnik je dana 14.05.2019. godine donio Odluku o pokretanju Otvorenog postupka nabavke usluge izrade Idejnog i Izvedbenog projekta ulaza u zgradu Općine sa rekonstrukcijom šalter sale i ugradnjom lifta, te rješenjem saobraćaja u mirovanju i hortikulture zajedno sa objavljivanjem Obavještenja o nabavci i tenderske dokumentacije na Portalu javnih nabavki BiH dana 17.05.2019. godine pod brojem: 1353-1-2-111-3-77/19.

Sažetak Obavještenja o nabavci objavljen je u "Službenom glasniku BiH" broj: 36/19 od 24.05.2019. godine.

Tendersku dokumentaciju sa Portala javnih nabavki BiH su preuzela 22 (dvadeset i dva) ponuđača.

Krajnji rok za dostavu ponuda bio je 11.06.2019. godine do 14:00 sati, te je izvršeno javno otvaranje ponuda, što je konstatovano Zapisnikom sa otvaranja ponuda od 11.06.2019. godine.

Nakon izvršenog otvaranja ponuda, Komisija za javne nabavke je pristupila analizi dokumentacije priložene uz ponude, u smislu provjere njihove validnosti, s obzirom na iskazane zahtjeve ugovornog organa u Tenderskoj dokumentaciji broj: 07/2-14-998/19 iz maja 2019. godine, odnosno pregledu ponuda u skladu sa procedurama i pravilima utvrđenim Tenderskom dokumentacijom, te Zakonom o javnim nabavkama BiH i pripadajućim podzakonskim aktima.

Shodno navedenom Zapisniku sa otvaranja ponuda, Komisija za javne nabavke je konstatovala da su zaprimljene 3 (tri) ponude i to:

R.B.	NAZIV PONUĐAČA/GRUPE PONUĐAČA	UKUPNA CIJENA (KM) bez PDV-a	POPUST	CIJENA (KM)SA POPUSTOM bez PDV-a	UKUPNA CIJENA (KM) sa PDV-om
1	Javno preduzeće za prostorno planiranje i uređenje grada "Zenica" d.o.o. Zenica	19.000,00	/	/	22.230,00
2	"I.D.E..A" d.o.o. Sarajevo	15.000,00	/	/	17.550,00
3	"Studio dva" d.o.o. Sarajevo	16.520,00	/	/	19.328,40

Uvidom u priloženu dokumentaciju i suštinskom provjerom sadržaja i validnosti iste, Komisija za javne nabavke je utvrdila sljedeće:

- I. Ponuda ponuđača "Studio dva" d.o.o. Sarajevo ne ispunjava formalno-pravne uslove tražene Tenderskom dokumentacijom i to:
  - Tačkom 7.4.1 pod b) TD su tražene obrazovne i profesionalne kvalifikacije pružaoca usluga ili kvalifikacije njegovog rukovodećeg osoblja i naročito kvalifikaciju lica koja su odgovorna za pružanje konkretnih usluga kako slijedi:
    - 1 (jedno) lice VSS VII stepen-dipl ing. arhitekture, odnosno visoko obrazovanje najmanje II ciklusa Bolonjskog sistema studiranja (koje se vrednuje sa najmanje 300 ECTS bodova) arhitektonske struke, sa položenim stručnim ispitom i 5 (pet) godina radnog iskustva;
    - 1 (jedno) lice VSS VII stepen-dipl ing. građevinarstva-smjer saobraćaj, odnosno visoko obrazovanje najmanje II ciklusa Bolonjskog sistema studiranja (koje se vrednuje sa najmanje 300 ECTS bodova) građevinske struke-smjer saobraćaj, sa položenim stručnim ispitom i 5 (pet) godina radnog iskustva;
    - 1 (jedno) lice VSS VII stepen-dipl ing. elektrotehnike, odnosno visoko obrazovanje najmanje II ciklusa Bolonjskog sistema studiranja (koje se vrednuje sa najmanje 300 ECTS bodova) elektrotehničke struke, sa položenim stručnim ispitom i 5 godina radnog iskustva.

Tačkom 7.4.2. pod b) TD je propisano da su ponuđači u svrhu dokazivanja ispunjavanja uslova iz tačke 7.4.1. pod b) TD dužni u ponudi dostaviti sljedeće pismene dokaze i to:

- Diplom o završenoj VSS i Uvjerenje o položenom stručnom ispitu za jednog dipl ing. arhitekture (VII stepen) i dokaz o radnom iskustvu i radnom angažmanu, odnosno Diplom u Uvjerenje o položenom stručnom ispitu za visoko obrazovanje najmanje drugog ciklusa Bolonjskog sistema studiranja (koji se vrednuje sa 300 ECTS bodova) arhitektonske struke i dokaz o radnom iskustvu i radnom angažmanu;
- Diplom o završenoj VSS i Uvjerenje o položenom stručnom ispitu za jednog dipl ing. građevinarstva-smjer saobraćaj (VII stepen) i dokaz o radnom iskustvu i radnom angažmanu, odnosno Diplom u Uvjerenje o položenom stručnom ispitu za visoko obrazovanje najmanje drugog ciklusa Bolonjskog sistema studiranja (koji se vrednuje sa 300 ECTS bodova) građevinske struke-smjer saobraćaj i dokaz o radnom iskustvu i radnom angažmanu;
- Diplom o završenoj VSS i Uvjerenje o položenom stručnom ispitu za jednog dipl ing. elektrotehnike (VII stepen) i dokaz o radnom iskustvu i radnom angažmanu, odnosno Diplom u Uvjerenje o položenom stručnom ispitu za visoko obrazovanje najmanje drugog ciklusa Bolonjskog sistema studiranja (koji se vrednuje sa 300 ECTS bodova) elektrotehničke struke i dokaz o radnom iskustvu i radnom angažmanu.

Ponuđačima je Napomenom II (strana 8. TD) jasno stavljeno na znanje da dokazi o radnom iskustvu za sve tražene osobe mogu biti Izvod iz matične evidencije uposlenih (PIO/MIO) ili Potvrde-Uvjerenja izdata od strane poslodavca.

Ponuđač "Studio dva" d.o.o. Sarajevo je za Amjad Al-Rez-diplomiranog inženjera arhitekture (strana 18-19. Ponude), Merdić Adisa-diplomiranog inženjera građevinarstva (strana 23-25. Ponude) i Osmanović Elmedina-diplomiranog inženjera elektrotehnike (strana 29-31. Ponude) kao dokaze o radnom iskustvu dostavio Curriculum vitae-životopis. Komisija za javne nabavke cijeni da dostavljeni dokazi o radnom iskustvu nisu u skladu sa postavljenim zahtjevima ugovornog organa iz tačke 7.4.2. pod b) TD (Napomena II) i da isti ne ispunjavaju uslove postavljene u TD, a kojim je jasno zahtjevano da se kao dokazi o radnom iskustvu za sve tražene osobe moraju dostaviti Izvod iz matične evidencije uposlenih (PIO/MIO) ili Potvrde-Uvjerenja izdata od strane poslodavca.

Zbog prethodno navedenog, a u skladu sa odredbom člana 68. stav 4. Zakona o javnim nabavkama BiH ("Službeni glasnik BiH", broj 39/14) predmetna ponuda je formalno-pravno neispravna i kao takva nije prihvatljiva za ugovorni organ.

Uvidom u priloženu dokumentaciju i suštinskom provjerom sadržaja i validnosti iste, Komisija za javne nabavke je utvrdila da Ponude ponuđača:

- Javno preduzeće za prostorno planiranje i uređenje grada "Zenica" d.o.o. Zenica i
- "I.D.E..A" d.o.o. Sarajevo

ispunjavaju formalno-pravne uslove, odnosno zahtjeve ugovornog organa tražene Tenderskom dokumentacijom.

Zatim je Komisija za javne nabavke pristupila razmatranju finansijskog dijela Ponuda ponuđača koji ispunjavaju formalno-pravne uslove, odnosno zahtjeve ugovornog organa tražene Tenderskom dokumentacijom, te je izvršena računska provjera dostavljenih ponuda i utvrđeno je da nema računskih grešaka, a sve u skladu sa odredbom člana 17. stav 1. Uputstva za pripremu modela tenderske dokumentacije i ponuda ("Službeni glasnik BiH" broj: 90/14 i 20/15).

Komisija za javne nabavke je konstatovala da je ponuđač Javno preduzeće za prostorno planiranje i uređenje grada "Zenica" d.o.o. Zenica dostavio Potvrdu Vanjskotrgovinske komore BiH, a u cilju dokazivanja ispunjenja uslova o primjeni preferencijalnog tretmana domaćeg, u skladu sa Odlukom o obaveznoj primjeni preferencijalnog tretmana domaćeg, donesenoj od strane Vijeća ministara Bosne i Hercegovine ("Službeni glasnik BiH", broj: 83/16).

Tačkom 9.2.TD je propisano da će ugovorni organ u svrhu poređenja ponuda primijeniti preferencijalni tretman domaćeg, u skladu sa Odlukom o obaveznoj primjeni preferencijalnog tretmana domaćeg, donesenoj od strane Vijeća ministara Bosne i Hercegovine ("Službeni glasnik BiH" broj: 83/16), te će u svrhu poređenja ponuda umanjiti cijene domaćih ponuda za preferencijalni faktor od 5 % za ugovore koji se dodjeljuju u 2019. godini.

Domaćim ponudama se smatraju ponude koje dostave pravna ili fizička lica sa sjedištem u BiH i kod kojih, u slučaju ugovora o uslugama i radovima, najmanje 50% radne snage za izvršenje ugovora su rezidenti iz BiH.

Nakon što je utvrđeno da je ukupna cijena ponude ponuđača "I.D.E..A" d.o.o. Sarajevo u iznosu od 15.000,00 KM bez uračunatog PDV-a neprirodno niska, odnosno da je za više od 20% niža od cijene drugorangirane prihvatljive ponude (19.000,00 KM) ponuđača Javno preduzeće za prostorno planiranje i uređenje grada "Zenica" d.o.o. Zenica, Komisija za javne nabavke postupajući u skladu sa članom 66. Zakona o javnim nabavkama BiH ("Službeni glasnik BiH", broj 39/14) i u skladu sa odredbama člana 17. stav 7. Uputstva za pripremu modela tenderske dokumentacije i ponuda ("Službeni glasnik BiH", broj 90/14 i 20/15) je aktom broj: 07/2-14-998/19 od 19.06.2019. godine zatražila pojašnjenje neprirodno niske cijene ponude ponuđača "I.D.E..A" d.o.o. Sarajevo.

Ponuđač "I.D.E..A" d.o.o. Sarajevo je svojim aktom broj: 33-06/19 od 20.06.2019. godine dostavio detaljno obrazloženje neprirodno niske cijene koje je Komisija za javne nabavke nakon opsežnog razmatranja jednoglasno prihvatila i uvažila, jer je utvrđeno da je ponuđač dostavio uredno obrazloženje strukture ponuđene cijene odnosno razloge za ponuđenu cijenu.

Nakon svega iznesenog, Komisija za javne nabavke je sačinila Rang listu u Otvorenom postupku nabavke usluge izrade Idejnog i Izvedbenog projekta ulaza u zgradu Općine sa rekonstrukcijom šalter sale i ugradnjom lifta, te rješenjem saobraćaja u mirovanju i hortikulture kako slijedi:

R.B.	NAZIV PONUĐAČA	UKUPNA CIJENA (KM) bez PDV-a	UKUPNA CIJENA (KM) sa PDV-om
1	"I.D.E..A" d.o.o. Sarajevo	15.000,00	17.550,00
2	Javno preduzeće za prostorno planiranje i uređenje grada "Zenica" d.o.o. Zenica	19.000,00	22.230,00

Iz navedenih razloga, a primjenom člana 64. stav 1. tačka b) Zakona o javnim nabavkama BiH ("Službeni glasnik BiH" broj: 39/14), Komisija za javne nabavke je jednoglasno dala preporuku Općinskom načelniku da donese Odluku o izboru najpovoljnijeg ponuđača "I.D.E..A" d.o.o. Sarajevo, za pružanje usluge izrade Idejnog i Izvedbenog projekta ulaza u zgradu Općine sa rekonstrukcijom šalter sale i ugradnjom lifta, te rješenjem saobraćaja u mirovanju i hortikulture, kao prvoplasiranom na Rang listi, sa ponuđenom najnižom cijenom tehnički zadovoljavajuće ponude u ukupnom iznosu od 15.000,00 KM bez uračunatog PDV-a, odnosno 17.550,00 KM sa uračunatim PDV-om.

**Pouka o pravnom lijeku:** Ponuđač koji je učestvovao u postupku nadmetanja može radi zaštite svojih prava, u roku od deset dana od prijema Odluke o izboru najpovoljnijeg ponuđača izjaviti žalbu. Žalba se podnosi Uredu za razmatranje žalbi BiH putem ugovornog organa.

Dostavljeno:

1. JP "Zenica" d.o.o. Zenica
2. "I.D.E..A" d.o.o. Sarajevo
3. "Studio dva" d.o.o. Sarajevo
4. Nadležnoj Službi
5. U dosije
6. a/a

032/460-914

033/554-121

info@dva.ba

OPĆINSKI NAČELNIK

  
Edin Smajić